

¡BOMBA!

Incertidumbre en la puerta,
y se llama a la lealtad;
en tiempos de adversidad,
¿hay quien quiera hacerle al Huerta?



K'uintsil

Martes 10 de febrero de 2026

CAMPECHE · YUCATÁN · QUINTANA ROO · AÑO 11 · NÚMERO 2660 · www.lajornadamaya.mx

U meyajo'ob Frida Kahlo, Diego Rivera yéetel Rufino Tamayoe' yaan u ka' cha'antalo'ob México



Tu jo'olaj óoli' junk'aal ja'abo'ob ma' e'sa'ak tu noj lu'umil Méxicoe', te'el k'iino'oba' yaan u ye'sa'al 68 u p'éel meyajo'ob beeta'ab tumen máako'ob je'ex Frida Kahlo, Diego Rivera, Rufino Tamayo yéetel María Izquierdo -máaxo'ob k'ajóolta'abo'ob yóok'olal k'a'anan meyaj tu beeto'ob ti' aartes plaastikaas ich siglo XX. Meyaje' ku k'aaba'tik Relatos Modernos, ts'o'oke' ti' kun e'esbil tu kúuchil Museo de Arte Moderno (MAM). Ba'axo'ob kun chiikbesa'ale' taaka'an ich u múuch'il Colección Gelman Santander.

Ba'axo'ob kun e'esbile' jmu'uch' tumen Jacques yéetel Natasha Gelmán, desde u deekadail 1940, ts'o'oke' yéetel le je'ela' ku káajal jump'éel meyaj tu'ux kun máansbil le meyajo'oba' yaan u k'aaba'intik Colección Gelman Santander. "K'a'anan yéetel noj ba'al ka káajak le túumben meyaja', ti' le lu'um tu'ux síij máaxo'ob beetej", beey tu ya'alaj Claudia Curiel de Icaza, máax jo'olbesik Cultura ichil U Jala'achil u Noj Lu'umil México.

U yéeyajil meyaje' beeta'ab tumen MAM, ts'o'oke' tukulta'ab ti'al u béyetal u xiimbalkunsa'al u jejeláasil xa'aybejilo'ob aarte modeernóo tu lu'umil México tumen ku chiikbessik bix líik' u íikonografíiyail le noj lu'uma', beyxan túumben tsikbal ku beeta'al yéetel le meyajo', je'el bix xan ba'axo'ob ku kéetel ichil tráadisyon beyxan móodernidaad.

E'sajile' tukulta'an u cha'anta'al ti' kan jaatso'ob: Retratos. Presencias construidas; Naturaleza: ich orden yéetel caos; La creación de una nación, yéetel lo moderno: paradojas de una nueva realidad. U tuukulile' ka béeyak "u yila'al le meyajo'oba' tumen túumben wiinik ku bin u líik'il, yéetel ts'o'ok u máan 20 ja'abo'ob ma' e'sa'ako'ob tuka'atéeni'", tu ya'alaj Curiel de Icaza.

Relatos modernos. Obras emblemáticas de la Colección Gelman Santander, yaan u ye'sa'al ichil u k'iinil 17 ti' febrero tak 17 ti' mayo ti' u ja'abil 2026, tu kúuchil Museo de Arte Moderno (yóok'ol u bejil Paseo de la Reforma s/n, Bosque de Chapultepec), tu noj kaajil Ciudad de México.